

ილიას სახელმწიფო უნივერსიტეტის სტუდენტების მიერ აკადემიური შვებულებით სარგებლობის წესის შესახებ

1. ეს წესი განსაზღვრავს ილიას სახელმწიფო უნივერსიტეტის სტუდენტების აკადემიური შვებულებით სარგებლობის წესს.
2. ილიას სახელმწიფო უნივერსიტეტის სტუდენტს უფლება აქვს ისარგებლოს აკადემიური შვებულებით ამ წესის შესაბამისად.
3. აკადემიურ შვებულებაში სტუდენტი შეიძლება გაშვებულ იქნას შემდეგ შემთხვევებში:
 - ა) მძიმე ჯანმრთელობის მდგომარეობის გამო, რაც მოითხოვს ქირურგიულ ჩარევას ან ხანგრძლივ მკურნალობას;
 - ბ) ორსულობის, მშობიარობისა და ბავშვის მოვლის გამო;
 - გ) სასწავლებლად საქართველოს ფარგლებს გარეთ მიწვევის გამო, როცა სტუდენტი შესაბამის უცხოურ საგანმანათლებლო დაწესებულებაში სწავლას იწყებს ან განაგრძობს პროფესიულ უმაღლეს, ბაკალავრიატის, მაგისტრატურის ან დოქტორანტურის პროგრამაზე.
4. უნივერსიტეტი უფლებამოსილია განიხილოს აკადემიური შვებულების მიცემის საკითხი სხვა ისეთი ობიექტური გარემოების არსებობისას, რომელიც სტუდენტს ხელს უშლის სწავლის გაგრძელებაში და რაც დასაბუთებული უნდა იყოს დოკუმენტებითა და არგუმენტებით. ასეთ შემთხვევაში აკადემიური შვებულების მიცემის მიზანშეწონილობის საკითხს, შესაბამისი ფაკულტეტის დეკანის წარდგინებით, წყვეტს უნივერსიტეტის რექტორი.
5. აკადემიური შვებულების ვადა მოიცავს არანაკლებ ერთ სასწავლო სემესტრს.
6. სტუდენტს აკადემიური შვებულებით შეუძლია ისარგებლოს არაუმეტეს ხუთი წლის ვადისა. ხუთი წლის შემდეგ პირს, რომელიც არ გააკეთებს განაცხადს სწავლის გაგრძელების შესახებ უწყდება სტუდენტის სტატუსი, გარდა კანონმდებლობით გათვალისწინებული შემთხვევისა.
7. სტუდენტი, რომელსაც სურს ისარგებლოს აკადემიური შვებულებით, განცხადებით მიმართავს უნივერსიტეტს. აკადემიურ შვებულებაში გასვლის თაობაზე სტუდენტის განცხადებაში მითითებული უნდა იქნას:
 - ა) სტუდენტის სახელი, გვარი, მისამართი და ტელეფონის ნომერი;
 - ბ) ფაკულტეტი, სპეციალობა და სწავლების წელი;
 - გ) ის სასწავლო სემესტრი, რომელი სემესტრიდანაც მას სურს აიღოს აკადემიური შვებულება.
 - დ) მიზეზი, რომლის გამოც სტუდენტი იღებს აკადემიურ შვებულებას და მისი დამადასტურებელი დოკუმენტები;
 - ე) განცხადების შეტანის თარიღი;

8. სტუდენტმა აკადემიური შვებულების შესახებ განცხადებით უნივერსიტეტს უნდა მიმართოს შესაბამისი სემესტრის დაწყებიდან არაუგვიანეს ერთი კვირისა, გარდა იმ შემთხვევებისა, როცა ამ ვადის დაცვა ობიექტური მიზეზების გამო შეუძლებელია.

9. სტუდენტის აკადემიურ შვებულებაში გასვლა იწვევს მისი აკადემიური და ფინანსური ვალდებულებების შეჩერებას აკადემიურ შვებულებაში ყოფნის ვადით, ასევე მიმდინარე სემესტრის ფინანსური ვალდებულებების გაუქმებას (ასეთის არსებობის შემთხვევაში). იმ შემთხვევაში, თუ აკადემიურ შვებულებაში გასულ სტუდენტს უფიქსირდება ფინანსური დავალიანება, აკადემიური შვებულების შეწყვეტისა და აღდგენის უფლება მიეცემა მხოლოდ უნივერსიტეტის წინაშე არსებული დავალიანების სრულად დაფარვის შემდეგ.

10. სტუდენტის განცხადება აკადემიური შვებულების შესახებ განსახილველად გადაეცემა შესაბამის ფაკულტეტს. განცხადებისა და თანდართული დოკუმენტების შესწავლის შედეგად თუ განცხადებაში მითითებული საფუძვლები ამ წესის მესამე მუხლითაა განსაზღვრული, სამი დღის ვადაში ფაკულტეტი უნივერსიტეტის რექტორს წარუდგენს მონაცემებს სტუდენტის შესახებ (სტუდენტის ჩარიცხვის, სწავლების წელი, დაბადების თარიღი, პირადობის მოწმობის პირადი ნომერი, აკადემიური პროგრამის დასახელება, დამატებითი საჭირო ინფორმაცია) და მოსაზრებას სტუდენტის აკადემიურ შვებულებაში გაშვების საკითხის გადასაწყვეტად. ხოლო თუ სტუდენტის მიერ განცხადებაში მითითებული საფუძველი სცილდება ამ წესის მესამე მუხლით განსაზღვრულ საფუძვლებს, ფაკულტეტი ხუთი დღის ვადაში უნივერსიტეტის რექტორს გადაწყვეტილების მისაღებად წარუდგენს დასაბუთებულ უარს ან თანხმობას სტუდენტის მიერ აკადემიური შვებულების სარგებლობის შესახებ.

11. აკადემიური შვებულება წყდება სტუდენტის განცხადების საფუძველზე. სტუდენტმა აკადემიური შვებულების შეწყვეტის თაობაზე განცხადებით უნდა მიმართოს უნივერსიტეტს სემესტრის დაწყებამდე არაუგვიანეს ერთი კვირისა.

12. აკადემიური შვებულების შეწყვეტის შესახებ სტუდენტის განცხადებით მომართვიდან სამი დღის ვადაში ფაკულტეტი უნივერსიტეტის რექტორს წარუდგენს მონაცემებს სტუდენტის აკადემიური შვებულების შეწყვეტისა და სტატუსის აღდგენის მიზნით.

13. სტუდენტის აკადემიურ შვებულებაში ყოფნა და აკადემიური შვებულების შეწყვეტა ფორმდება რექტორის ინდივიდუალური აქტით, უარი აკადემიური შვებულებით სარგებლობის შესახებ სტუდენტს უნდა ეცნობოს წერილობით.

14. აკადემიური შვებულებიდან დაბრუნებული სტუდენტი იხდის მასსა და უნივერსიტეტს შორის გაფორმებული ხელშეკრულების მიხედვით დადგენილ გადასახადს ხელშეკრულებით განსაზღვრული და არგუსის ფინანსურ ბლოკში მითითებული გადახდის გრაფიკის შესაბამისად.

15. იმ შემთხვევაში თუ ის სასწავლო კურსი, სპეციალობა, რომელზეც სწავლობს სტუდენტი მილევადია, ერთჯერადია ან არსებობს სხვა მსგავსი გარემოება, რომელიც შეუძლებელს ხდის დაბრუნებული სტუდენტის სწავლის გაგრძელებას იმ პირობით რა პირობითაც იქნა ჩარიცხული და აკადემიურ შვებულებაში გასვლამდე სწავლობდა უნივერსიტეტში, მაშინ უნივერსიტეტი სთავაზობს დაბრუნებულ სტუდენტს ყველაზე ახლოს მყოფ სასწავლო კურსს, სპეციალობას

ხოლო ასეთის არარსებობის შემთხვევაში სტუდენტს შეუძლია ისარგებლოს შიდა/გარე მობილობით დადგენილი წესით.